

VENDIM
Nr. 401, datë 18.6.2014

**PËR PËRBËRJEN, FUNKSIONIMIN DHE MËNYRËN E SHPËRBLIMIT TË KOMISIONIT
KOMBËTAR KUNDËR DHUNËS NË SPORT**

Në mbështetje të nenit 100 të Kushtetutës, të nenit 50, të ligjit nr. 9376, datë 21.4.2005, “Për sportin”, të ndryshuar, me propozimin e ministrit të Arsimit dhe Sportit, Këshilli i Ministrave

VENDOSI:

1. Komisioni Kombëtar kundër Dhunës në Sport të kryesohet nga zëvendësministri i Arsimit dhe Sportit dhe në përbërje të ketë 5 (pesë) anëtarë dhe 1 (një) koordinator/sekretar, si më poshtë vijon:

- Drejtorin e Sporteve në Ministrinë e Arsimit dhe Sportit anëtar;
- Drejtorin e Përgjithshëm të Policisë së Shtetit anëtar;
- Presidentin e Komitetit Olimpik Shqiptar anëtar;
- Sekretarin e Përgjithshëm të Federatës Shqiptare të Futbollit anëtar;
- Një gazetar sportiv anëtar;
- Një specialist në Drejtorinë e Sportit në Ministrinë e Arsimit dhe Sportit koordinator/sekretar.

2. Komisioni Kombëtar kundër Dhunës në Sport thirret, si rregull, nga zëvendësministri i Arsimit dhe Sportit, jo më shumë se 4 (katër) herë në vit, pas njoftimit të bërë nga sekretari. Sekretari i Komisionit përgatit materialet që do të shqyrtohen dhe ua vë në dispozicion anëtarëve të Komisionit, 7 (shtatë) ditë përpara mbledhjes. Komisioni i zhvillon mbledhjet kur janë të pranishëm jo më pak se pesë veta, në të kundërt, ajo bëhet jo më vonë se dy javë nga data e njoftimit të ri.

3. Anëtarët e Komisionit Kombëtar kundër Dhunës në Sport përfitojnë, për çdo pjesëmarrje në mbledhje, një shpërblim prej 5 000 (pesë mijë) lekësh. Pagesat për shpërblimet të përballohen nga buxheti i miratuar për Ministrinë e Arsimit dhe Sportit (“Programi i sportit”).

4. Vendimi nr. 18, datë 13.1.2006, i Këshillit të Ministrave, “Për përbërjen, funksionimin dhe mënyrën e shpërblimit të Komisionit Kombëtar kundër Dhunës në Sport”, shfuqizohet.

5. Ngarkohen Ministria e Arsimit dhe Sportit dhe të gjitha institucionet, përfaqësuesit e të cilave janë përcaktuar në pikën 1, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Edi Rama